



1 4
1555
229



門 14
號 1555
卷 229

梧溪集卷第四下

江陰王逢原吉

浦東女

浦東鉅室多豪奢浦東編戶長咨嗟丁男殉俗各出贅
紅女不暇親桑麻鶉鳩呼兩棟花紫大麥飯香勝小米
一方青布齊裹頭赤腳踏車爭捲水水低岸高力易歇
反水上田愁漏缺穀種看如瓜子金野鴉不銜田鼠竊
黃草衣薄風披披日色照面蒼煙姿南鄰北伴更貧苦
糠粃糜粉隨朝齏阿嬾送茶相向語鉅室新爲州府主

梧溪集卷四下

一 鉅不足齋叢書

四
川
十
五
年
購
求

妻拜夫人婢亦榮繡幃朱輪照鄉土羊牛下來雞欲棲
汪汪淚眼數行啼女自身長苦非一歸路白楊斑竹西

胥門柳

今年胥門十一月楊柳青青寒不脫彫戈白馬黃須郎
朝朝忍見行人別行人吳頭或楚尾心趁飛花度黑水
避暑鑿輿狩未回都人南望思投筮都人泣向都官道
塞北江南柳還好風纏露沐恩旣殊報荅春光願終老
君不問虎狼之秦六國雄可憐千丈泰山松至今稱是
大夫封

君莫疑

日不偏照天無私丈夫明日張膽爲龍蛇大澤實同處
家富身榮君莫疑亞父還鄉遂亡楚魯連去國翻全齊
載拜載獻玉東西疑多患成將噬臍

今日何日四首留別龍江諸名貴士友時甲辰九

月移居橫泖

今日何日白露晞東家西鄰柿棗肥些蟹登鱸魚上磯
大兒借舟女憊衣載遷避地身莫歸

黃獨未大黃精疎瓠壺牽蔓滿前除木犀花開陰覆書

我獨何心亟離居感子載遺雙嘉魚
今日何日天風涼僕奴整齊車馬光青衿玉珮鶴髮黃
雜然執酒蹠道傍與我而別心不忘
今日何日潮大來天風送我帆當開匪君之故重併個
人生所貴無嫌猜春明再過江上臺

避地無錫

武臣弄兵連西鄙白馬東人火桑梓婦女往往殉節死
扁舟載家南入吳祭器之外皆無餘寸心已逐越鄉鳥
十月暫食梁溪魚濁醪泥賤好濡首金印斗大莫懸肘

葉公政還金辭

有序

公政字克明淮陰人國初行宣政院都事季實之子
翰林直學士蟾心之從子也至正甲午政以浙省幕
史奉卜顏平章檄轉餉鄂閩時丹陽富民束子章先
與是役會飲于蘄氣合卽以兄禮事政未幾起赴河
東泣別曰弟今濟大江涉重地兄言行篤信願以貲
相託政謹藏之越兩月束之友朱率其奴來報曰束
不幸入蓮臺湖遇盜死矣政披淚曰束已矣家固無
恙也勞之去明年竣事還鎮江要束氏啟囊緘得鈔

二百五十緡黃金五十兩銀三百兩珠八千枚衣帛
有差歸之束氏餘鈔五十緡黃金五兩銀五十兩珠
千枚有朱題封歸之朱二氏盛醴饌以謝辭之前國
史編脩官膠西張復初嘉政義高爲著還金記且稱
政幼知讀書澹利祿嘗從平章克池之諸縣破蘭溪
渠魁徐貞一平斬小寨司輜糧四年無纖芥譴何平
章凡七薦中書不報人謂公侯子孫必復其始天道
豈獨遠耶至是逢播之詩曰

斬春肥羊采石酒君爲玉昆我金友夜談接膝晝握手

乾坤意氣同高厚霜風吹蓋客衣薄溼雲羈鴻飛漠漠
蓬窗篝燈照裝索嗟君遠行感君託蓮臺湖深浪拍銀
鷓鴣杜若傷心神天生禍亂有今日誰謂交游無古人
葉郎還金何愧竇禹鈞

題謝伯理同知義山卷

范公有義田謝侔有義山溪清土沃厚什伍其冢橫雲
閒旁分畛域共神道金銀無氣應長好松根月冷鬼燈
花松上風吹女蘿草禁煙時節爭祭掃多是遭兵去鄉
保散牲一任野鴉銜焚帛還將心事禱舊魂旣妥忻往

同新骨未掩母悲哀子孫繩繩世種德盡買九峯為夜臺

題錢慶餘綾錦墩

莘亭東有蟠龍塘塘上姓錢人種桑就陽避涇淺布子
咄分曠列如鍼秧封培愛護長尺許畚鍤爭移春社雨
清農報德也自奇一本約輸雙簣土土高過客相指語
千綾萬錦登城府懷材莫救時斂徵存心尚紓農辛苦
侍御周公伯溫題名綾錦墩錢郎嘯歌墩樹根但願一絲不
到體老著布袍青苧衣

題蕭翼賺蘭亭圖

右軍蘭亭書繭紙五朝天王但聞耳不謂虬髯龍鳳姿
密遣行人來賺已嗟爾何必飲恨死舊賺君親晉陽起
君不見萬年弓劔橋山藏玉柙曷為温韜防

孫皓城甄歌

甄左邊有大吳寶鼎二年歲次丁亥造十一字

古瓢一片莓苔質傳自夫差臺下出埏埴由來寶鼎年
字畫依稀皇象筆當時民勞甚蒸土鐵壁堅城堪比數
可憐不久歸典午山人揮涕重摩挲天意天意將如何

劉夫人

劉夫人至正太尉吳王嬪笄珈車服置弗御淡煙常鎖
雙眉春中州援遠敵在目叔貴日驕疆日蹙背城借一
王本心狐埋狐搨將軍欲夫人勇決烈女義百口樓居
親舉燧片時陰慘萬世生月明風清珮音至君不見男
兒成敗古有之孰以楚霸輕虞姬蘇民安得夫人祠烏
棲白鳧庶少衰

挽梁先生 有引

先生名益字友直號庸齋三山人有詩傳笏通行於
世

燕入吳雲二月前先生獨上馬洲船方期花柳陪行樂
不意蘋蘩薦豆籩萬里乾坤空老眼半生風雨共寒氈
長沙鵬鳥悲王傅滄海鯨魚歎謫仙幸有官奴繼書法
何須驥子誦詩篇有人願守三年墓夜看文光直上天
寄陳昌道檢校時淮藩復濠泗徐邳等州

右轄揚兵燹社湖淮東草木遂全蘇登萊海色浮樓艦
蒙羽山光落版圖白獸遠瞻霄漢闥玉麟頻剖廟堂符
煙青土銼遺民喜月黑沙場舊鬼呼漫說楚材多用晉
從來郢曲盛傳吳延陵君子初觀樂南郭先生久廢竽

田野舊遊應不忘風雲壯志合長驅中原平定尋盟日
咸賀軍謀得漢儒

奉寄楊宣慰

天王重紀至元初視草金鑾異直廬中夜前星懸虎穴
早時旭日駕龍車兵還侍衛孤臣謂伯顏丞相窺詔下雲霄
五色如陸贄大才行倚馬張褒長嘯遂焚魚山居宸翰
輝泉石奎閣碑文重里閭盛蹟有光楊少尹內廷深憶
鄭尚書一麾出守桐江上千室安全劫火餘公守建德時淳安監
起親諭外閫思瞻新斧鉞故園歸伴老樵漁白駒春靜
以安

嘶高柳黃鸝風清戾太虛丞相敦行上尊禮時應萬嶺
候仙裾

酬謝杭州見簡

秋日高居樓上頭倦拋書疏看雲浮生滯自信孤蓬轉
好事還陪五馬遊簾展竹深香噴鵲詩成花底玉鳴球
人才孰與元暉竝郡政羣推叔度優露泣銅盤卑漢武
潮回犀手壯錢鏐觀君注意尊王室豈但疲癯獲少瘳
奉覽宋丘文定公江淮宣撫使加官誥命為公六
世孫嘉興主簿文海賦

長淮繚繞舊河山五色花綾誥載頒王室偏安劉岳後
人材深倚范韓閒重城月夜疎扁鑰北騎風秋密轡環
宋後金亡爲善報題詩忻對綠陰閒

寄聞雲芟道士

冰瀉清溪洞府真別來二十五經春人閒忍見黃金鴈
海上思乘赤玉鱗身自一閒猶是客隨凡三洗未離塵
琪花樹滿雲深處頭白林宗儼挂巾

奉題宋謝后之祖太師觀文殿大學士益國公深
甫封衛王追封魯王二誥後王之六世孫鐸字振

文有詩名黃巖秀嶺巡檢其子瑛以茂才薦授安
仁縣諭不就隱居海上

當年后德配關雎王後雲仍盡讀書喬木家山烽燹外
五花官誥喪亡餘源淇左右鸞鑣遠蒙岱崇高鶴帳虛
豈藉椒風歌寵渥伏波動業日星如

贈王履道還江都

有引

履道名貞乙未歲避地吳下久之太尉張公開藩博
采羣材遂以湖州德清儒學諭辟之不受時予亦以
承德郎行元帥府經歷辭及予隱海上而履道已客

授於此今年戊申始過其醉琴之所且聞先隴獨免
兵禍治行色喜墓廬有日於是贈八句以見履道出
處同而孝義非予所及也詩曰

斧鉞藩開任俊良君辭儒校我辭郎青燈淥酒同今雨
短褐窮櫬度十霜膾斫鱸魚初上水樓焚燕子不歸梁
揚州月在簫何處廬墓無殊衣錦光

送郡萬戶尹靜如巡海漕

元勳世胄濟時才金虎三珠燭上台誰起野田旗影豎
馬穿官柳珮聲來伏波銅柱諸蠻驚下瀨樓船萬弩開

饋餉漕通哺饗暇巫門山染雅歌臺

送郡守靳利安攝江浙理問

省臨吳越位崇高西掖仍開大理曹非比迎猫空雀鼠
竟須投轄掣鯨鰲峰當南北無移筆海入江淮有建旄
上相待參帷幄政肯容偏郡獨賢勞

讀閩僧謙牧隱所題鴈宕大龍湫西瀑布常雲展
旗天柱卓筆雙鸞峰諸詩神思爲之飛動槩括一
首

鴈宕龍湫氣混濛展旗卓筆勢爭雄翠狝霄漢雙鸞影

玉立東南一柱功，興入常雲飛夏雪。醉看高瀑挂晴虹，
總慚尊者空諸有。萬木圍巖夜自風。

送梅判官子玉之崑山

白茅連港海風高，文筆嶄峰保障牢。萬舸待輸中國餉，
千金爭買外蕃刀。疎煙落日烏鳴巷，濁浪流冰馬飲壕。
非復曩時歌舞窟，算篁車駕莫徒勞。

觀大府除日盧宐典希文改知崑山奉寄四韻

使君紫馬被金鞵，七載宐典屢被圍。寸土曾無蜉蟻援，
餘生終與鴈鴻歸。寒畱松菊風霜節，春幹東南造化機。

喜有老成同在選，山人何厭薜蘿衣。

月夜宴上海馬千戶敬常吟壘徵詩醉中走筆

露涼秋闊海涵天，酒湧金波月滿船。坐對龍光南斗下，
意行魚復亂沙邊。長城李勣元無學，清嘯劉琨晚可憐。
野樹烏翻垂漏盡，醉狂惟覺步兵賢。

冥鴻亭偶題二首時歲戊戌

春陰過卻幾番風，野杏山櫻霧雨中。新水綠塘鶯竝浴，
嫩寒茆閣燕微通。大兒稍熟春秋例，幼女歡趨組繡功。
四十今年渾意足，酒炊香滿巷西東。

一家無事樂清寧
寄日冥鴻野外亭
江水未分南北限
月明常後畢箕星
子生猫櫟垂垂赤
蔓長鴉藤故故青
天意物情應有在
且須料理相牛經

荅僕嘉定公文遣書使請觀上丁禮

令兄御史未官時
數會金陵卞壺祠
箕尾上騎雲漢表
鴈鴻南寄海天陲
三槎燈鼓春聲接
五桂鄉閭夜夢馳
祀典況修酤禁弛
扁舟穩赴上丁期

謝王茂脩真人送蒲鳥

送來蒲鳥絕輕柔
野服黃冠稱遠游
便欲天壇朝昧爽

更從華蓋立高秋
望中弱海平東瀉
腳底罡風直上浮
卻過緱山竝驂鶴
玉笙吹月鳳麟洲

和楊文舉提學自壽及喜得孫詩韻

三鱣堂開宴佩紳
鳳凰枝長碧梧春
豈但陳羣稱大父
早應羊祜省前身
幾家暮雨千江隔
十載秋風萬國貧
獨有高門文脈盛
明珠重映白頭新

題王好問進士松瓢齋虞奎章書扁

一瓢何在萬松閒
閣老知名爲寫顏
貧窶素甘居陋巷
幽貞時復夢箕山
石花照夜青牛出
天籟鳴秋白鶴還

星有匏瓜爛雲漢未應濩落遂投閒

聞何上海子敬毀淫祠開鄉校因寄四韻

名緯吳陵人

魚米駢登橘柚垂備聞佳政起深思
女巫罷進神弦曲鄉校新陳魯頌詩
風葉晝埋公館靜霜鐘寒度海雲遲
高天鴻鵠東回首亦欲朝陽借一枝

奉寄靳太平處宜

江東道院古名州山臥蜿蜒渚伏牛
淮楚寒沙侵渡闊湖荆春水入天流
登臨每起詩人想保障新紆太守憂
好弔允文英偉跡蔽雲犀甲從輕舟

奉陪貢泰甫侍郎翟仲直州尹丘文中教授遊君

山貢有詩屬逢和程儀可幙長爲序
山有春申墓港入黃田似野壕
山橫鷺鼻淨江濤珠光夜冷三千履
金背晴浮第一鼇太守政聲南斗逼
侍郎辭氣五雲高吳帆楚鳥來無際
愧屬吾儕肆酒豪

奉寄翟池州

名諒

清溪亭前五馬鳴九峰樓上一琴橫
蛟鼉夜靜聞更漏草木春深識姓名
上國驚心淮祲隔故都回首毫雲平
篇詩不盡桐鄉愛江雨江風白浪生

謝李良臣趙芳仲二判官枉顧時歲甲午
江左歸來今年一家八口在書田已甘夜雨燈相共
豈料寒灰火始然白簡近煩驄馬使錦袍時過玉堂仙
長才久慰州民望憂國何時奏一篇

題乙酉冬信州諸名游所送逢護母櫬還鄉圖詠
後

溪山漠漠樹號烏老弱天寒總在扶遂有致芻徐孺子
尚多送麥范堯夫死生不變金蘭義離亂猶存水墨圖
恨少停雲詩後續月明千里影同孤

無錫寓隱謝王左丞彥熙攜酒饌遠過

玉帳旂旌拂紫冥樓船神物護青萍風雲密擁將軍樹
江海孤懸處士星深愧草茅優簡拔未忘蒲柳易飄零
竹西歌吹高陽酒喜爲尋春過野亭

贈孝翟道士

有引

翟字性存嘉定人會兄弟相繼歿母范衰義挈以養
請於師孫一真孫如其志焉

孝翟道士名守常結喉長鬣氣老蒼諷經得錢低小屋
汲水煮菽元元廊席帽山人爲裏茗天廚神丁當饋漿

似聞仙桃爛紅熟王母昨離瑤池傍

送淮南王左丞分戍浙省

太尉新觀神策兵左丞分戍武林城浪花曉夾龍驤動
邊草春隨馬足生地仰粵蠻衣繡錯天低牛斗劔光平
遠柔鄰睦圖宐早別業青衣取次行

奉和周大參伯溫送還龍江寓隱韻

家寄青龍白鶴江徘徊落日影成雙賓筵久謝元王禮
親隴猶依季子邦春老鳳梧瞻省掖秋遺蠡稻接漁疇
君侯過譽慚何敢未許雞鳴近宋窗

壬寅夏兒掖自杭應鄉試回龍江寓隱得故人戚

均玉書餽是日杜敏瞿度賈貫三友同飲冥鴻亭

上

大郎新觀場屋回故人書對好懷開烏帽偏稱水晶佩
酪粉方進白蓮醅高視橋頭月波湧醉眠亭下天風來
一時三友詩興發老筆不知何所裁

贈孫士能照磨

名恆濮人明易

離離霜木聳蕭晨海上棲遲亂後身不忝杜陵歸白帝
復憐江革護慈親文風地入雞豚社雲漢天臨蟣蝨臣

猶有大麻書斷絕東陽山水數凝神

送祝洞天真人奉皇太子令旨降香名山川

羽駕春辭靈武城東南雲起動心旌萬重山落炎荒野
十二樓開白玉京周穆久應閒八駿劉安何得問長生
龍香願爲斯民祝歲晚相期說治平

題馬季子懷靜軒

有序

懷靜軒者居延馬季子之所剏也季子之先曰月哥
曰理术自雍古部族居靜州天山一傳爲習禮吉思
仕金死節諡忠愍血食汴之襄忠廟二傳爲月忽那

北入見憲宗

斷事從世皇南征以勞

拜禮部尚書

世昌尚書省郎中四傳

爲禮宣政都事五傳爲祖中浙西監倉使仲氏祖常
繇進士第一人入官至翰林大學士六傳爲季子隨
都事公居於淞之竹岡軒以懷靜名示不忘本也敬

題詩曰

爾家世德肇居延忠義勳名兩代傳碧血濺波歸九地
白衣扶日上中天鳳毛麟角聯青紫春雨秋霜隔隴阡
惟有終身誠孝切祁連如見氣蒼然

十二月廿二日爲重陽王真人誕辰是日立春在
松江長春道院瞻拜真人及七真像敬題薛一山
丹房

寒盡東風破曉陰真人遺像儼如臨山中霞熟千年醞
海上蓮開七朶金朔地與王資化力鈞天朝帝動仙音
私忻泉石膏肓久終日凝神紫氣深

登鶴坡道院寥陽閣爲王雲岡外史題

咸淳地闕聳寥陽丹碧瞳矐照下方海嶽夜朝笙鶴駕
星辰日侍袞龍章太清玉境何高爽九有黃埃苦混茫

螻螻小臣身草澤寸心徒曳五雲鄉

寄福建參政景福仲禎今削髮爲僧名福大全前
南臺御史丑閏時中仲子也

一門忠孝世三傳節鉞弓旌映後先白業漫脩三竺境
丹心老戴八閩天鴈違寒雨菰連澤魚上春冰瘴少煙
爲報舊遊王朴在最閒林下亦逃禪

奉題招討使台州石安撫鴈蕩能仁寺遺詩後附詩
嵐霧開明鴈蕩山元戎旌羽建禪關五花吐筆天龍擁
三箭收功士馬閒鬼戴舊恩餘噍類孫全遺體幾憂患

木溪集卷四下
一春風雨相將晚醉覺睂閒喜色還

我行天下山水半側身西望長嗟歎山到蜀川方絕
奇世殊又被微官絆萬里提兵鴈蕩來高牙一展嵐
霧開松風吹騎聯鑣入高日下照繙經臺老僧振錫
去何所香篝寂寂佛無語山鳴谷應應者誰似有秦
民宅幽阻姑休爾旅枕爾鋌雲深不得驚龍眠冰簾
一派瀉琤玉歲與清氣中洞沿二三溪碓長林下人
力罷春天所借草香花淨太古春虎嘯猿吟明月夜
幽尋靜勝登嵯峨鸞旗柱筆光影摩詩成寫破峭壁

翠稽首巖前諾巨那右詩如此公諱國英號月澗宿
州靈壁縣人金季時居材官下僚元初用文武才仕
至福建宣慰曾孫宣武將軍松江萬戶瓊嘗乘遽道
經寺得是詩於老僧且言公初入台秋毫無犯士民
豫附旣移鎮有告叛者大將欲獮薙之公請再行叛
者更生焉瓊後歆峯戍行獲歸隴畎今年春偕倩曹
生攜訪予風雨下因出卷誦之殆見公存心仁律下
嚴悠然雅歌而神采炳如也祖作孫述孝念抑可泯
乎乃併序而歸之

木溪集卷四
覽金應奉李獻可所撰參政遷平陽尹宏州魏公
子平致仕誥及墓碑爲其九世從孫山東運司知
事貫題

棟梁材具玉清溫祿養高年荷國恩短蓋犢車臨綠野
御廚麝脯遞黃門墓碑莫罄忠純蹟誥墨猶含雨露痕
因話當時小堯舜不知溪上草煙昏

讀白寓齋詩有序

寓齋字君舉金之隩人登泰和三年詞賦第累遷樞
府棄官隱居教授卒名與元遺山趙閒閒相頡頏欒

城李治序其詩曰龍韜雷厲於紛拏之頃玉唾川流
於談笑之餘逢觀其題靖節圖有云咄哉靈運輩竟
坐衣冠辱誰知五柳家春雨東臯綠風節可槩見矣
併錄謝元公八句夢裏薰風湛露歇花開漢苑舊經
過拾遺老去青春暮司馬歸來白髮多橫槩賦詩吾
豈敢短衣扣角夜如何相逢未盡相思話草色連雲
水碧波弟文舉亦登貞祐進士第贊戎政著功當時
馮西巖內翰有科第聯飛光白傅之句稱擬云
太白南流昂漸高樂天退隱擅詩豪中州河岳歸元魏

彭澤風煙入晉陶茅屋不眠歌慷慨金源回首髮髯騷
當時耆舊皆陳迹何處青青沼沚毛

宋楊后翫月圖詠賜兄提舉王一大尉爲朱生孟

清題

桂松交葉露光零複道爐香引翠輶雉尾扇開張樂地
鳳形山抱望江亭一時萬里冰田白幾載中原野燐青
罷覽遺圖按遺調寧皇應恨不曾聽

將投海上自鴻山往泰伯瀆別王左丞以父老言
言馬跡山漁商小船非攻守具得釋五百五十人

數倍之及回舟八句寄左丞

韋褐清游馬跡西忍聞篁竹鷓鴣啼雲昏赤地沈天狗
月落孤舟背水犀小戶漁商聊復業深憂父老不遑棲
疊連楚越非吳計須是宗周與會齊

宿馬跡山殷南山煉師道院既還鴻山畱別八句
道士偶見苦竹灣畱我養高松桂關龍蟠大澤雲水晦
馬跡巨石土花斑綠章奏夜百靈集素髮看春一鶴閒
忍上歸舟卻回首裊裊清磬煙嵐閒

張孝子 有序

張孝子諱天麟字仲祥平江之嘉定人祖瑄江西參政初從忠武王平江南旣航宋圖籍重器自海入朝復建策海漕江南粟世皇特寵任之由是與河南左丞崇明朱清貴富爲江南望至元末儉人姚衍誣二氏瀕海異志上不聽詔丞相完澤曰朱張有大勳勞朕寄股肱卿其卒保護之成宗嗣位未幾疾后專政樞密斷事官曹拾得以隙踵前誣后信輒收之丞相完澤奉先帝遺詔諍莫解參政竟獄死籍其家沒入諸子女或竄之漠北麟時年甫冠諸王有欲奴朱張

後者麟長喟曰吾先世勲力王室一旦無罪廢乃忍奴我族耶泣訴將作使忻都爲奏占匠戶諸女亦入繡局麟猶以冤食不甘味寢不安席大德九年春訟之省臺弗理夏四月上清暑上京麟拜輦道左有命侍臣代問旨未得又伏東華門欷歔流涕不輟言甚哀婉歷陳先朝顧遇爲讒佞構陷狀尋勅中書省遣使召還竄者改父文龍董日本賈舶武宗初超遷都水監仍俾治海漕大司徒大順公奏免匠役繡工家令星哈思的啟皇太子以麟直宿衛至大三年選授

麟絳路坑治提舉弗就曰訾坑吾家尚何坑爲仁宗御極眷幸益隆載念曾大父未有葬地其上海之烏涇別業參政尤樂之卽陳請於上曰此孝順之道也詔中正院還其籍上爲議者沮延祐二年春請復感切始如其志秋八月撫藏以祖妣太夫人趙祔時王清獻公都中來會葬以上嘗語題其門口孝順之門元統二年江浙平章牙不花薦舉終不起麟晚通易子守中前鄉貢進士嘉禾俞鎮爲著誌逢括其槩系以詩詩曰

三朝雪涕大明宮咫尺威顏卒感通百輛珠犀歸寶藏千區松柏倚青空天妃罷燭滄溟火野史追揚孝里風誰謂奸臣終愧漢石榴苜蓿也封功

李司徒堅畱不果旣送防護舟楫軍帖詩柬呂掾實

上公折節禮殊優復送軍符護野舟鷺蕩遂專歌孺樂鴻山寧負采真遊亂雲石磴高垂蔦落日煙坡下飲牛席帽先塋青在望幅巾行從萬貔貅

遊孔宅寺題僧文宗魯房

九曲溪行地百尋墩名宰我歸如岑居僧幸淑詩書教
過客疑聞金石音芝草鳳麟空日落桃花雞犬自村深
一盃罷奠衣冠墓試問衣冠元初為盜所發淚灑襟

八月五日

八月端午天南風痿臥輒起坐牀東野堂掀茅見太白
庭樹落果走鄰童五湖浪高鱗族橫三山根浮鼇力窮
安得飛車訪列子一瞬雲征萬里鴻

和荅張光弼判樞

湖上三峰一草堂春風回首免葵長似聞平子愁機密

終使何人號最忙西蜀櫻桃詩有在東家胡蝶夢相忘
登樓詞賦工無益頭白為農二陸鄉

和荅孫大雅教授兼柬吳蔡二氏昆季

梁紇祠荒磬罷編東家書就幸逢年階庭竝列封胡秀
故舊新承雅頌篇桑外影長西崦日研中光倒始青天
我家攝拊非戎比姑傷旌陽種藥田時兩兒從許太和習醫

頻年歸盡首已狐兩地初休繞樹烏伏勝終身秦博士
王符甘分漢潛夫絳桃飛淚袁崧宅翠苻牽愁陸瑁湖
吳蔡慶門親且好不知能為秣驪駒

聞吳門消息二首

百尺齊雲半壁開陪臣猶進九霞杯蓬星氣白干天棊
茗水烽青入露臺盡擬田單收故土不期高幹損雄材
淮魚信斷燕鴻隔吳樹蕭蕭葉下來

承制除封八鉅州士恬馬飽適逢秋三年弟傲羣情懈
十月城圍百戰休海陽何人歌爲挽華容有女淚空流
唇亡遂使諸蕃感板蕩將貽上國憂

無題五首

五緯南行秋氣高大河諸將走兒曹投鞍尚得齊熊耳

捲甲何堪棄虎牢汧隴馬肥青苜蓿甘涼酒壓紫葡萄
神州比似仙山固誰料長風掣巨鼇

天槍幾夜直鉤陳車駕高秋重北巡總謂羽林無猛士
不緣金屋有佳人廣寒霓仗閒華月太液龍舟動白蘋
雪滿上京勞大饗西封華嶽弔秦民

白衣鱗鱗渡吳兵赤羽旌旗奪趙營灤水天迴龍虎氣
榆林風逐馬駝聲靚妝宮女愁啼竹白髮祠官憶薦櫻
猶有海鷹神不王鴛鴦高去塞雲平

五城月落靜朝雞萬竈煙消入水犀椒闥珮琚遺白草

木天圖籍冷青藜北臣舊說齊王肅南仕新聞漢日碑
天意人心竟何在虎林還控鴈門西
廿載羣雄百戰疲金城萬雉自湯池地分玉冊盟俱在
露仄銅盤影不支中夜馬羣風北向當年車轍日南馳
獨憐石鼓眠秋草猶是宣王頌美詞

後無題五首

一國三公狐貉衣四郊多壘鳥蛇圍天街不辨元黃馬
宮漏稀傳日月闌嵇紹可能留濺血謝元那及總戎機
祇應大駕懲西楚弗對虞歌北渡歸

吐蕃回紇使何如馮翊扶風守太疎范蠡不辭勾踐難
樂生何忍惠王書銀河珠斗低沙幕乳酒黃羊滅拂廬
北陸漸寒冰雪早六龍好扈五雲車

回首崑崙五色天疎風落日重侗儻駕驂八駿非忘鎬
臺置千金舊慕燕地限上林雲過鴈雪封西嶺樹啼鶉
遠慙行在周廬士橫草無功日晏眠

險塞居庸未易劇望鄉臺上望鄉多君心不隔丹墀草
祖誓無忘黑水河前後炎劉中運歇東西元魏百年過
愁來莫較興衰理只在當時德若何

黃河清淺海塵揚
陝月關雲氣慘蒼
寧復明珠專篋社
尚論玉兔踞金牀
衣冠竝入梁園宴
簡冊潛回孔壁光
私幸老歸忘世事
梧桐朝影對溪堂

舟過吳門感懷二首

躍馬橫戈東楚陞
據吳連越萬熊貔
風雲首護平淮表
日月中昏鎮海旗
玉帳歌殘壺盡缺
天門夢覺翮雙垂
南州孺子為民在
愧忝黃瓊太尉知
強兵富境望賢豪
戴縱垂纓恨爾曹
一聚劫灰私屬盡
三邊陰雨國殤號
江光東際湯池闊
山勢西來甲觀高

形勝不殊人事改
扁舟誰酌月中醪

奉陪何禮部

鏞

蕭揚州

琮二公皆前郡守

劉總管

若水侯

治中邦

郡判官鄧

定

知事陳

文杰

教授翁

仁實赴

理幕蔡

廷秀

澄江義塾率眾執事行鄉約禮逢次

理幕韻

術序行鄉約衣冠集
寓公駿奔多秀彥
瞻仰及愚蒙
化煦芹邊日仁行
草上風盟卑齊相
管禮鄙漢臣通義
變延陵俗心歸呂氏
功題詩重起廢非
敢銜雕蟲

覽周左丞伯溫壬辰歲拜御史扈從集感舊傷今

敬題五十韻

華夷今代壹畿甸上京遙遊豫循常度恬熙屬累朝六
飛龍夾日獨角豸昂霄御史箴何忝賢臣頌早超咨諏
新境俗觀采衆風謠文用彌邦典忠惟振憲條執徐當
景運仲呂浸炎歊愠解民心結煩除聖念焦雨工趨汛
埽市令薄征徭大口謹移蹕庸關肅衛刁縉雲峰立曉
薌月水涵宵傲道臣臣俊清塵騎騎驍豹羆嚴御鞞駝
象妥鑾鑣儀仗真如畫車徒不敢囂侏言來部落皮幣
贄荒要岳牧恭迎舜封人願祝堯六宮程緩緩列寺思

飄飄線裊雙行鞋珍鳴雜佩瑤寶鈿榆莢小錦罽草花
嬌繡襖珠鞵絡香鬟玉步搖婕妤辭竝載王母會頻邀
拾翠深沙嶺梯虹複澗橋天長躔北日斗近建南杓珍
味高陀鼠丹馨散地椒廬兒分逐兔土屋競停鷗白貉
衣溫座黃羊酪凍瓢桓城金合脊樂闕紫嶢嶢社稷尊
王統山河固廟祧明明神爽降秩秩禮文饒寵遂光幽
朔畋同閱獮苗蹠林醮已舉款塞福皆徼椽殿三呼歲
楓墀九奏簫祝融回酷暑少昊戒靈颿舊制先回輶良
辰次起輶謝恩多帝胄紀實得臺僚至治音俱雅於皇

德孔昭相如慚禪議謀父感祈招蕞爾斬興稜紛然頽
煽妖漕輸橫蜃鱷衡祀缺管蕭邊警初傳箭軍容半珥
貂荐添烽埃迫有甚火雲驕衣服中垂拱微垣外寂寥
幾多遺鶴髮曾共望雞翹二洛遄通晉三韓復入遼不
無雙國士正賴一嫖姚求劔舟難刻更弦瑟好調扶顛
須砥柱撥亂豈芻蕘戎幕辭巢父詩壇老伍喬式瞻阿
閣鳳馴止泮林鴉併論公殊蹟吾知邁董晁

寄僕正字

君遷正字職秩視校書郎太乙藜分焰銅山露湛光鶴

班清漏裏鶴駕霽雲傍署轉宮花密溝迂御柳長芸窗
填竹素蓬觀啟銀鑄魚豕知譌舛鉛黃屬訂詳聖王經
貫道家世桂名坊一氣根幽朔羣英萃豫章比蒙青眼
待益見白眉良傳癖稱元凱文宗得子昂冠將峩獬廌
豺已避康莊大器遭斯運凡材信彼蒼哭親嵐瘴邑懷
友月蘿房病謝臺臣薦書煩驛使將暖餘牛背日寒遠
馬蹄霜野褐方山帽畦蔬德操桑策陳憐賈誼裾曳恥
鄒陽任性何孤僻傷時或慨慷園丘虛墀墮太廟攝蒸
嘗珥筆誰丹屐紆金盡玉堂海涵恩靡極袞補責宜償

十樣牋霞祭雙壺酒雪香珠璣新傑作龍虎古雄疆好
約重觴詠秦淮夜對牀

哭中書兵馬都指揮邵維翰可大

有偉睢陽彥嘗歌北上行禮羅賓相邸板授倅山城旣
察淮陰叛旋趨洛下營鳳池臨節鉞虎衛掌農兵編戶
牛千具圭田黍一成孔明興漢室管仲會齊盟盛業期
王輔良圖寓雜耕癸庚呼密邇戊己寄非輕赤汗屯中
盭髣髴馬首纓春醑朱鷺翻霜獵阜鷗橫望眼空梅子
剛腸厭蔓菁坐談機孰失憂憤疾先嬰泣血孤兒淚扶

喪外弟情雲黃低晝髮雨黑暗丹旌越霸傷吳沼秦雄
駭趙坑荒涼嵩短氣嗚咽隴流聲誰料餘生辱君爲蚤
死榮美詩樓舊倚高論座曾驚薦菊寒泉冽懸芻古木
清仙游費公院尚覽我題名

同工部觀員外飲錢治中第

山人籠席帽星使屏旌旄樂共鴛鴻序身殊犬馬勞輕
裝空薏苡大杓灑蒲萄雪落鑿刀鱸雲開碧海鼇北頌
書尺一南餉粟千艘傾蓋忘分手天清斗正高

遊籀山 有序

斡山距華亭州六里土宜美箭故名橫泖襟帶流石
參錯東向壁內一石斬斬中斷俗傳南有干山此則
干將試劔石云宋張頭陀雨華洞久塞玉竇泉殊冽
寒可味逢交謝逸人守真始獲盡觀山之秀蘊其不
羣不附殆類古特立獨行之士卓卓物表者蓋九山
之宗庸衆固弗識也逸人自九世祖二十進士仲華
韜德於是至今詩書仁義之澤未艾又居民率多壽
耆詎非風氣淳厚所致耶逢旣遺逸人北丘耕隱歌
復表出是山書置山僧德誠菴壁後有青鳥者流過

焉庶逢之言有質也時至正甲辰仲春望同遊詠者
謝守真陸綱余寅釋德慧鄭里謝椿詩曰

地主多儒雅居僧亦不羣泖橫孤嶂立野闊九山分石
裂蒼龍氣泉渟玉竇雲燕巢猶舊月馬鬣幾斜曛久亂
殊風景茲遊隔世氛天邊詩趣得谷口足音聞童孺握
趨慣朋儕倡詠勤桃花吹酒煖草色上衣薰畫俯金銀
杵觀隴畝文芳鄰行可接芟製莫輕焚

簡夏嘉定

百里繞吳煙重過喜地偏深城遲閉戶細港倒回船暮

汝蠆開甲秋原木放棉民風返淳厚正賴使君賢

扁舟

扁舟何所好日夜不相離風雨情難測山河影暗移采蘋游女慣載鶴去官宐一任無依著黃頭莫漫維

題日本齋大徹上人眇海軒

地極東三島天旋外九州羽車仙或到龍藏叟同遊赤岸銀河合珠星璧月流高居任清淺不暇數添籌

題章叔敬詩藁

誌銘後附

同舍生長往平居詩思閒疎星澹瓊樹高閣遠青山謝

吏楚氛下哭親吳苑閒山人誌墓碣應解舊愁顏

君諱齊字叔敬姓章氏少喪母趙鄉貢進士子方陸

公器其侍父文殊孝謹許妻以孫女長善詩尤好琴

有田膏腴有宅靜邃暄晨涼夕藥闌竹嶼俎腴豆腴

奉卮壽樂婉愉也至正十五年八月守臣構亂遂謝

吏祿奉父隱淞上亂定歸踰年城復陷時父外往齊

草舍露行閒道訪候兵後躡奔吳門且物色諸昆季

姪姓之流散者而父終不見乃哀毀致疾七日呼子

庠具紙筆書蓼莪詩首四句卒壽三十七子一卽庠

也女瑄尚幼庠以鄉里梗隔姑葬上海之奧原明年
衷衰持徐嶧狀來拜請銘逢以齊生同里學同舍於
庠荐有師友之好因不辭銘曰始焉同歸終焉分攜
孝乖慈睨祗繫亂離死可以無悲

劉節婦 有序

劉冀之衡水人十二歲通古文孝經見小學書固請
讀之母不許一日聞諸兄誦至姆教婉婉聽從復請
於母曰此亦女子事遂通內外篇及笄適同郡曹泰
財五月紅巾陷河朔曹故大家辟兵縣西聊城村賊

掩至大掠見劉居羣人中殊美持刃輒驅之劉曰吾
婦人惟知從夫而已不賊從也賊冀其悅己乃出金
珠寶前以綺衣被劉劉裂碎之擁上馬墮地者數四
賊怒繩其項係馬後曳之劉以爪據地頭觸石流血
罵賊死江西權衡吳興錢震並贊述其事逢詩曰
芳氣飄蘭茝和音節珮珞遂聞兵死際不失禮防初野
白冰霜骨塵黃鳥獸墟淖沱血淨洗好過洛神居

紅紙帳奉送朱知事太夫人

溪藤百杵成桃浪縠紋生日氣虛湯谷霞光護赤城暖

木溪集卷四
添顏面盡寒隔夢魂清正爲夫人壽高堂快雪晴

簡察士安御史時過江陰物色太夫人壽藏之地
山龍到江盡士馬爲親畱草木黃催暮巖巒碧露秋虞
衡忻伏謁夔魴避冥搜瓠子岡伊邇陰功自可求

送靳奉使妻馬氏夫人葬無錫璨山雨宿山中道

院

一磬聞朱閣重岡亘璨山美人猿化去弔客鶴飛還
菜叢生石梅花半掩關雨來氣清迴高枕夢似閒

乙未八月避地前湖三首

兩地初讎殺全家屢死生守臣無大過雄長自相爭
魴魅鬻當屋鴝鵒啼過城前湖落木外排難愧齊卿
借地安樵爨秋煙滿桂叢禍因貧賤少詩到亂離工有
妹音徽隔諸兒起臥同數畦烏口稻滿待熟天風
竹底秋光薄牆根朝日暄稍通鄰曲好深荷野人恩
細雨菰生米新霜芋長孫加餐向茅屋醒眼看乾坤

九月十三日鄉兵盡燬丘文定公故第逢自前湖
往白分帥鐵迭公義挈妻子親屬及鄰廿二家承
遣掾閔景行護送出南郭復得人船先抵鳳村詩

簡鄰友

鉅室俄焦土比鄰弗定居死生今日託殘暴幾時除過

漏大迎寒木槲疎姑期鳳村隱行止報來書

鳳村黃氏菴書壁二首

倉卒投田里崎崿閱歲時簞瓢不改樂風化頗關詩迴

野垂星大高天上月遲本非枕戈者待旦亦何辭

舊宅驚煨燼危城入變遷血殷蠻觸野虹白斗牛天生

理艱難徧憂心斲喪全祇應與妻子長載五湖船

老夫

兵火餘苟舍天災剩老夫復愁瀕草澤翻喜罷苛需白

髮心隨短青燈影自孤時清重賜帛能衣一絲無

十月六日見近地起白虹旣烽煙且東北望者謂

是州城未午聞城陷無錫華彥清人船適至遂行

一首

冠帶迎寒旭茅簷見白虹非時乖氣異多暴歲華凶吳

水聯南鷁淮烽斷北鴻去鄉千百指悲喜集私衷

陽山寇猖甚移刺元帥畱不果遂入吳泊梅林一

首

舟泊梅林寺鐘清欲下霜無家重適國多累獨縈腸野
水相呼鴈天衢直上狼貴游旄鉞擁何道致平康

自虎邱復還華氏館二月六日無錫陷親鄰幸全

一首

將校知何去親鄰喜再生手停杯屢暖慮遠事堪驚世
歇虞薰曲雲連蜀斗城自慙非鄭子谷口只躬耕

密聞貢平江詭姓張平軒遁海上傷懷一首

聞道今張祿羈棲滄海村微吟在野兕暫託避風鷄積
雨吳天缺浮雲漢月昏伍符一與千石貴休論

丙申八月紀事時戶鄉里入吳還華館遂卜隱鴻

山

寸舌解重圍長歌振短衣不成巢父去空似魯連歸蔡
港沙田薄黃山宰木稀伯鸞吾所慕梅李况魚肥

常州江陰再失無錫告警病中自鴻山將遷海上

一首

病就山中隱烽催海上舟連城新鬼哭深壁大臣羞赤
胷躡金火炎風汗馬牛遙占女兄弟先已下長洲

次婁門喜姊妹家屬竝至遂同舟由巴城湖東下

一首

不盡朋游義深鍾姊妹情小康煙異爨重亂月同行軹
井寒泉咽鍾離怨氣平謂言江海上桑稼待時清

淨土寺天鏡講主母蘇氏歿送葬不及挽之以詩

鄉里稱孀節家庭服姆儀兒修黃蘗行身踐柏舟詩梧
露鳴簪井蘭風遶故旄南州送葬客清酒獨來遲

哭鄉友承理文簡濯纓其軒名逢嘗為作賦

性地敦天秩生涯託化居遇兵渾棄帑為友獨存書夜
枕長聞鶴朝羹忽厭魚傷懷濯纓下賦昔擬相如

寄慧朗元白 有引

至元二十五年冬丞相張士信重徵僧度牒錢僧苦
一之時朗住持杭之天華寺因斷一臂說四句偈以獻
於是賴免者衆明年春有自赭石來者為求贈言且
云朗鄉之崑山人有道行乃寄詩曰

時宰徵錢急山僧斷臂歸寸心塵不昧全體月還輝赭
石高風振金城霸業非似聞寒壑底虎子尚號飢

哀公顯道憲史 有引

顯道諱大有歸德之寧陵人至正辛巳以書經中河

南鄉試授廬州儒學正甲午辟淮西憲史明年從分
憲按蘄黃紅巾陷廬母妻女姪舉莫知所向乃客授
吳中既病學者於朱子四書有所未通著思問錄四
卷學者便焉張太尉凡兩聘擢竝辭甲辰春有自廬
以母喪來告者顯道北望長號日夜痛心遂致疾卒
葬吳縣筆鎗塢子某甫六月於乎可哀也已詩曰
壯日鄉書薦中年憲幕趨親容千里隔世亂一朝俱醴
酒醲辭楚萼羹美厭吳私憐鵬臆對誰卹鳳毛殊

日本進上人將還鄉國爲錄予所註杜詩本義照

旬日贈以八句藤其國中著姓

重譯歸看母僧中獨爾能上方雲一鉢滄海月千燈雀
舳蒙衝艦龍函最上乘杜詩書法隱母惜授諸藤

寓隱鴻山承無錫張倅罷一境搜粟之擾既李司
徒命僚佐物色戰艦鄉鄰徐氏船在拘籍中予以
家船代之口號謝張及司徒僚佐

舊亂經重坎新僑感二天境無搜粟尉鄰有載家船勸
趙嗟夷甫宗周仰仲連鴻山爛白石容臥紫蘿煙

中吳采蓮巷重會前州牧

有引

州牧西域人氏江陰達魯花赤也比任屬城破聽調
無錫軍中無錫亦破被繫九月予偶聞言於今左丞
王晟釋焉且自具人船餼飲送其還牧德予以奴奴
於予爲謝予辭不受至是重會徵詩詩曰
故侯囚楚日子客亂兵閒片舌非圖報長須遂卻還荒
煙深井臼大雪幾關山偶會愁長別吟鞍荷再攀

題余忠愍公所撰兩伍張氏阡表

有序

張昆弟二人景星諱共辰景山諱竝竝以儒學官累
遷景星霍丘主簿景山滁州判官天永仕淮省員外

郎謝病隱居教授棟上景山孫也

東淮海王國兩伍世儒宗家鸞鸞春聯瑞龍蛇歲起嗟天
文新日月阡表古煙霞口後承餘慶辭官喜鬢華

懷唐伯剛

有引

名志大如臯人嘗爲泚藩統兵無錫裨將虜巨室甥
女以予言徵還之

最憶吳興守當時義莫漚軍中歸虜婦堂上舍詩人野
飯雕胡滑山齋寶晉新文蘇美風韻想見雪茗濱
聞中書平章丁公死節其子伯堅嘗從予遊

明公冠豸日獨客病蛇秋幸得爲儒老承聞殉國休青
城無化鶴函谷斷歸牛惟有南俘鬼陰風面北羞

哀故淮省郎中海陵俞忠夫

有引

忠夫諱齊賢本陰陽家者流張太尉開藩忠夫與有
功達識丞相奏除前職及太尉稱吳王累犯顏諫止
不聽且板授淮省參政遂杜門謝病以卒

太尉稱王號郎中謝病軀孤狼霜月淚羣鴈稻梁圖初
志宗周鼎餘生待屬鏤全歸至正未足愧楚鉗徒

題余廷心參政爲霍丘值古山尊師撰遇仙觀記

後

蓼西緜館闢淮省大參銘地泄煙霞氣山潛木石靈荒
茅無盡白汗簡有餘青黃髮吳陵叟灑然鶴姓丁

邵彥文臺掾使吳藩承過旅次問所擬河清頌橐
欲歸呈大夫普公時予病不果錄姑詩以謝彥文

善醫

一騎南臺使知予頌陸沈欲聖天子目少露野人心茅
屋秋從破雲山日向深裁詩勸高義所願紫團參

謝周侍御伯溫書跋二丁三年所擬河清頌

近者山人作新承侍御書分甘終草野辭敢達椒除晉
帖唐臨盡秦碑漢校餘時應對朝日光動壁中魚

題長春道院許元逸所藏桂風子與朱貞一真人

詩後

仙人桂風子勇別上清君晞髮三神日巢松五老雲桃

稚今問訊奎閣

謂虞文靖

舊論文遊幔峰青疊蓬頭

謂金尊師竝

鶴羣

題朱翬遠鳳山丹房圖相子先所畫

子先中國士基罷畫雲間菓幹蜿蜒水青分鸞鷲山客

捫蘿薦入童採朮芝還覽卷神為往鮮飈灑珮環

送崔則明同僉之紹興總管

風氣通藩郡朝儀聳柏臺溪山當鏡入鼓角自天來凋

弊嗟多故承宣屬大才春耕貴早省先雪剡梅開

題南翔寺僧瓚宗璞西房

重過梁朝寺詩僧尖瘦權閉門雙樹月煮藥半牆煙流

落驚人語消搖出世緣自今可無憾名賴老夫傳

柯博士臨文湖州墨竹為頓悟寺堅虎石上人題

官罷奎章閣竹臨文使君似將湘女淚痛灑鼎湖雲雉

木溪集卷四下
扇梢堪挹鸞笙葉忍聞山僧置巖塢佳氣若網縑

贈董仲仁府判

府判身強健銀魚映故貂低頭居矮屋扶杖說中朝夜
鵲南枝冷春鴻北路遙好同商皓隱莫赴子房招

至正丙午三月廿八日自橫泐遷居烏涇宋張驥
院故居有林塘竹石因扁堂曰儉德園曰最閒得

六首

卜宅賓賢里生涯始有涯憂緣常念亂貧爲數移家徑
合交枝果簾當獨樹花池臺幾峰石相友臥煙霞

平生一丘壑今住小林泉樹古走藤蔓沙虛行竹鞭紅
蛛網石罅白燕下琴邊不有故山憶溪南買祭田

鄰曲敦新好園林恍昔游衣冠時徑入棊槩夜忘收已
遂萁羹興何煩杞國憂人生貴行樂兩鬢颯先秋

池深雛鳳穴地浸小龍泓白石垂綸影蒼苔拄杖聲人
心常澹泊風物自虛清多卻詩千首無由避隱名

丘園宜養病薄暮一俳佻倦蝶投煙草潛魚樂水苔尊
中天影落巾上月明來家政傳兒子惟須藥籠材

無才甘在野多懶愜行園石露溥雲氣池風損水痕草

深眠雉子林靜習鴉孫擬著幽居錄漁樵共討論

過廣浦林洪聰上人承示湖廣郎中余闕書撰舊

主滌河化城禪寺碑記淮西憲僉王士點篆額為

題左方

舒州余柱國百戰死酬君天地留元氣山林被慶雲世
無哀九辯吾及頌斯文僉憲俱陳迹爐香為一焚

奉題車玉峰先生世運錄後 有引

車氏世居永嘉由唐末徙黃巖始盛大一家師學淵
源實肇敬齋先生敬齋曾孫隘軒有五經論平居錄

隘軒孫是為玉峰諱若水字清臣賈似道三聘入史

館辭不受夙承父某春秋學復師杜清獻公 範清獻

學於從父 諱暹字良仲南湖公南湖學於朱子玉峰巖然

諸先輩後所著述曰宇宙略紀曰世運錄清獻嘗序

之曰重證大學章句則魯齋王先生為沿革論以實

之曰得車君書言致知格物傳未嘗亡也自知止而

後有定以下合聽訟一章儼然為格物一傳使朱子

聞之當莞爾一笑云玉峰孫浚浚之子程咸與予交

因示世運錄讀之大有裨於通鑑綱目然未板行於

時慨歎不足姑敘世系大略於左并頌以詩曰

有宋車先德生成道學資義辭丞相聘經證大賢遺泮
水涵魚藻高岡老鳳枝再觀世運錄仰企不勝思

游漕湖遂過鶯蕩登梁鴻山北望感時懷歸二首

家寄寬閒野身逢大有年羣龍西北極斗酒水雲天二
老歸來晚狂奴故態賢殊悲鸚鵡賦重讀馬蹄篇
捨權舒高目鄉山落穀中因聞吳賜劍懶問楚亡弓殘
日羣鴉路危城一鶴籠何時復舊業牛女對疎桐

陳子章出示吳藩馬參政誅文因哭以詩諱玉麟

海陵人

道義雙金重風神片璧輝榮親華皖簣迎客倒顛衣百
戰城頭破全軀地下歸論詩憶傾耳香閣漏聲微

掖還鄉

冢嗣還鄉籍予心獲少安亂離爲客倦衰病過家難霜
月烏啼苦河冰懶影寒發春忻在望薦祖五辛盤

夢靳公信州利安諱仁

有後序

昨夢過朱輪衣冠儼主賓清齋三月守厚德八鄉民山
鎖薔薇洞天低杜宇津論心復道舊分首悅超塵

公由中書通事出長道州幕陞江西省檢校遷知諸
暨考最代浙相版授江陰尹三月復授理問其年徽
人迫江陰境舉家合仲季弟百餘口蒼黃無依子爲
覓舟挈避蘇旣浙東帥觀孫復州城而公奉相檄撫
綏軍庶時東八鄉巨室細氓多脅從者帥請加兵公
從子師於予又感予義因問八鄉故予曰民非樂亂
無父母耳父母寄舊在公今公來不其子乎帥惟公
命其有不矜宥乎遂具語帥止轉同知常州道閔幣
齒亟移文掩焉及任左丞黑黑獎公諳大體公曰草

文則布衣王某也逢用受左丞知尋辭歸公亦退隱
杭致仕信州總管卒平生清儉詳恕所至布善政云
題宋丞相董公致仕誥後

兵籌閒葛亮經術老韋賢正氣風靈協清名斗嶽懸墓
無金下殉家有誥今傳載拜書遺蹟英靈儼在前
公嘗帥潭凡民居火例以軍救已則有賞軍往往俟
火烈覬徼厚賞一夕火公至立阜燾下令曰火到聚
星門先斬蘇統制軍遂力救以息壽六十九薨諡文
清葬當塗石城山元僧總統楊璉真伽發公墓一無

木溪集卷四下
所殉嘉歎掩如初公配張累贈衛國夫人生叔度知
婺州生雋壽古田縣丞生祥發廕承務郎徙居松省
憲交薦辭或問故曰世祿宋忍他食耶生天麒天麒
生士方咸隱居教授士方會予朱生弦家旣示誥且
語公逸事及家乘願有述予以公勲業筆諸史矣而
誥有云伊洛之書盛行獨以身而體蹈莘渭之事雖
遠常望古而慨慷孔明如秤之心居然服衆儀休拔
葵之操端可矯貪併撫附云
得兒掖書時戊申歲

客夢躬耕隴兒書報過家月明山怨鶴天黑道橫蛇寶
氣空遺水春程不見花衰容愧耆舊猶話玉人車

饒士程式以謙山長卒其友趙謨捐地葬之予哭
以詩

憶過桃花塢言隨伯雅深欲披宏演腹爲納比干心世
守祠先禮時傾侍客金龍江墓草碧還倚望鄉襟

憶朱芹湖

有序

公諱顯忠字彥良如臯之芹湖人昆弟五同居協雍
公身長七尺負氣謹行太尉開藩掄公分帥曹涇三

考義兵長多素封家罔敢餌以利有孝女盜樵鹵毛
兵執獻既知母病用市藥卽慰釋之陳徐二儉人潛
掠商貨杖而徙其鄉前進士楊維禎實且老歲周祿
米他物稱是予嘗客隱吳下每過聽言論無倦色及
戊曹遣千戶史岳邏徼就饋問予再躬往餉焉席上
徐謂曰竊審子製作率節義事私錢四萬敬爲壽梓
助子辭文不稱事公曰事非文不傳幸毋讓今節義
事盛行公力太半焉公今歿矣姑億八句非簡公也
示不以恩于己而繁于辭云詩曰

樓櫓海天垂彫弓韞虎皮錦鮮清暑宴白馬上春旗人
感官刑弛塗歌盜跡移壽文錢四萬時往致予思

寄任子良府判兼簡元朴鎮撫伯溫都事伯璋縣

丞

龍江羣玉樹曾不外葭葦抱病三年獨全生兩地俱巢
頻移社燕味弗改秋鱸擬過還鄉楫童孫從紫襦

夢左丞呂公仲實乙亥歲以浙憲僉按江陰予拜
識焉

漢盛登安國唐衰擯九齡人閒猶望雨天上忽騎星故

郡瞻風裁端居接爽靈孤松倚喬岳想像北柯青

贈買閩教授

有序

買閩字兼善西域人元初祖哈只仕江南遂家上虞
父亦不刺金力資兼善學以禮經領至正壬寅鄉貢
浙省臣因北向途梗權擢尹和靖書院山長旣航海
赴會試而後期不果禮部尚書李公尚綱特言之朝
勅授嘉興儒學教授及還會政屬淮閩屏居幽遐且
十餘年曲奉二親甚至今春訪予最閒園風雨花落
離索滿目觀其志尚孤卓殆忘世之荐變身之益貧

也乃酌之酒贈之詩云

顯印西域士鄉薦十年前隴畝心中越山河枕上燕尊
同漂梗地門掃落花天慕殺柴桑老詩題甲子編

哭門生朱文禮

有引

文禮字彥則朱徽州自齋公之曾孫也父道存長江
陰幕首延予西第禮於兄弟閒風裁清邁言往往如
老成會紅巾亂舉家還上海居無何上海陷旣苗帥
復地大掠祖妣縣君與母氏諸父季弟相枕兵死禮
同兄被虜得不葅醢以逃重見父於中吳而父復旅

死兄弟相弔人多念者不幸禮又短命死哀哉前是
上海巨姓有女許倩其弟弟歿欲遂倩禮重賂媒善
說之且遣家僮盛致儀物器玩禮一無動心竝謝曰
昔者孔圉以姑繼妻太叔疾之弟唐太宗元宗率納
弟妃敦倫遺臭莫甚焉禮奉教於君子稔矣議乃寢
嗚呼使禮生國初時膺爵位建法令則水草畜牧之
野其肯聽依本俗婚醮而陷大有爲之君子不義乎
翹楚秀茗風雨奄萃天其爲哉禮素性孝友多可稱
者予因錄其九哭之詩云

春日果投車秋風茅捲廬不爲獲雜行曾讀世遺書關
度雞鳴早鄉還鶴唳餘黃泉二親見悲感謂何如

同前進士鐵公毅張林泉夜宿朱良佐梅雪齋

香動暮寒輕窗含月迴明寸心游太素萬物讓雙清半
樹苔偏溼中庭鶴不驚孤山剡溪興異代一時并

莫月鼎法師道行錄爲海虞山致道觀周元初題
有序

法師吳興人宋莫公提刑之後也諱起炎字月鼎生
寶慶丙戌儀觀魁梧精神爽拔幼習舉子業嘗三試

弗利遂究心元學放浪江湖閒縱狂任酒往往作字
類霞倚雲侷靈異惚恍使人莫測所爲寶祐戊午秋
紹興旱馬守裕齋迎禱雨雨大澍理宗三十五代觀
妙天師咸贈言有元至元戊子世皇徵如上京祈雪
驗輒止師陞陳曰天氣中和萬彙順暢不立抑也上
悅賜上尊命典其教固辭歸吳癸巳冬微疾弟子王
繼華奉湯藥殊謹因囑曰明年正月二十六日非爾
所能療也至日浴更衣書辭世一章問繼華何時殮
曰棺衾已具端坐曰俟五事備旣逝夜三鼓天洶洶

雲風雷雨電俱時未驚蟄繼華愕然悟乃斂葬長洲
陳公鄉實三十一年也始師抵青城山丈人觀禮徐
無極及聞建昌鄒鐵壁得王侍宸道妙卽往備僮役
鄒病且革欲厚遣師泣以實告特授張星一符訣自
是行四十年若響影子惟師能雪夏雨暝者其術也
憤世託狂遠蹈之操則君子取焉序而詩曰
南北動君王風霆雨雪將金花牋寵錦紫柘盃封黃叔
世儒無效先天道大光何當閱焦涸陰殛幾宏羊

題元故參政張公畫像 有序

公諱文虎字山雲江西參政瑄中子也生而魁壘面如滿月善左右射至元十三年賊橫海侍瑄擊獲之賊黨立季父背將緩縛覆害公覺拔刀斫賊踵仆一軍震驚十五年南征遂以勞授忠顯校尉管軍總把佩銀符明年征日本十九年宣力海道二十一年遷武略將軍管軍千戶佩金符督餉輸京師丞相引見上嘉歎公異吳產詔去帽親撫顙曰真我國臣二十二年敗婺州楊先生二十四年鎮南王脫歡征交趾陞定武將軍交趾海船萬戶佩虎符轉粟從至松柏

灣逆戰擊敗之既暑疫王議罷兵以後躡懼公屯巨艦隘口約戰趾不爲寤竟全師還二十五年超懷遠大將軍慶元總管兼領海船萬戶佩三珠虎符民庶乂安二十八年擢嘉議大夫行戶部尚書海漕都漕運府事開便道有功二十九年拜中奉大夫湖廣參政賜翎根甲兜鍪弓矢刀劔將兵復征交趾成宗卽位徵還大德三年冬移京畿漕運使尋改江浙參政五年領江淮財賦都總管七年家覆臨刑色不變有白氣上千識者冤之公性尤孝友太夫人疾侍藥不

出戶限者三月與宋處士陳雲巖爲布衣交敬不少
衰平章高霸都素壯公聞其死太息曰水無張朱陸
無劉二霸都則我亦死矣因哭喪明延祐二年姪天
麟護喪歸葬妻夫人高氏祝髮守志逢獲交公從孫
守中式瞻畫像旣題以詩且爲序勳行如左云
目電氣凌虹鳥號左右弓家財金谷夢餉道鄴侯功畫
像高堂上皇圖落照中元孫守韋訓喬木耐飄風

朱秦仲僉樞趙仲德水軍婁江舟中夜宴席上二
首

大幙分開闔三邊罷枕戈春寒畱水國天影落銀河年
少孫征虜威名馬伏波樓船恨淹泊清話及陰何
澤腹解春冰方舟靜宴朋大魚跳白月馴鷺狎華燈漢
有鴻門會齊多徇盜能清風滿揮塵不計酒如澗

讀俞建德詩藁

有後序

白苧紛吳語芳蘭歇楚馨斯文天未喪諸老氣猶生煙
火孤村僻江山故國橫誰甘草同腐杯酒汗脩名
公鎮名伯貞字崇德人登鄉貢進士第累遷建德路
建德縣尹卒其所遺詩藁凡百餘篇予盡讀之得文

學行義尤著者八人其一曰礪峰曹先生江西人負碩

學當宋末屏居講授士多歸之有春秋凡例大學演

正藏於家其二曰顧辰伯嘉禾人為國子生時淮荆多

虞闖府檄屢辟卒隱德終其三曰忠惠蔡公襄六世

孫伯可師劉後村廕父官為郎既歸附即不仕其四

曰禮部尚書衛公上達五世孫謙號山齋松江人明易元初

忠武王版授溫州路治中亦堅辭其五曰徐成仲善

詩建德巨族昆弟九人同井爨歲饑輒捐廩賑之鄉

鄰火延燎若干戶伐山木繕完以居朝廷榜其門曰

義門其六曰張彬之茅山人素泊于利一毫不競里

有兵難冒鋒刃救止焉其七曰揚州蔡應祥事二親

盡禮二親歿刻木肖像祠益謹其八曰歙女張適同

郡汪三桂甫五旬而汪蚤世張誓守節孝奉舅姑祝

同姓子逢辰為後詔表其閭於乎采詩觀風之政竝

廢久矣而職太史者又多缺遺教弗復興俗愈大壞

閒有材德士幸或見于野史又不必傳將來卒同漸

滅草腐於乎天高地遠瞻望無及變遷離索吾誰與

歸也

梅東隱居士寄跡南山道院以其高志因美二首
飽更世故勇投閒自補仙曹洞府班赤汗黃塵雲火下
翠瓜紅酒石林閒

滿山怪石臥羊羣一水寒沙浸竹雲仙鶴似知新有主
天風零亂羽衣裘

題龔行可逃荒別後

有序

丁未大侵殍殮蔽野當斯時雖抱道之君子礪志之
丈夫靡有不困厄者若予里胡氏婦舉室危亡之際
情有可矜者因紀以詩曰妾身雪中竹雪虐竹自持

妾心水中石水流石不移自與郎合香恩愛靡少衰
賓椽誓偕老豈料遭年饑山田無耜採土銼斷煙炊
索飯兒啼號垂白姑尪羸不見東家伯逆子獸獍爲
不見西舍叔尸蟲潰牀帷地赤草木殫云胡弗思惟
五口相枕餓一口寧生離一口不生離五口死有期
孰若鬻妾身倉卒乃得資得資糴官米可救姑兒飢
董永尚自賣郭巨亦埋兒失節事極大疇昔已粗知
計出不獲已舍此將安之姑兒命苟活臧獲役何辭
姑健郎有恃兒長郎有依願郎篤慈孝天嘗相陳遺

錦鴛兩分飛各免肝腸悲妾有贖歸日鏡有重圓時
右逃荒別行可所作也行可越人名轍有冷淡生活
詩一帙烏涇王處野藏之久逢一日與鄰父老王壽
櫟顧心月郭壽榜徐靜頤夏奇峰秀巖昆季過焉處
野延憩茂樹下偶出帙共覽之皆幽人逸士語後得
是詩紀胡氏婦予嘉歎曰行可庶仁者之存心也遂
題二詩期以并傳焉
困厄凶荒古有之詘身殉養婦堪悲將心若置良人腹
坤道乾綱兩不虧

奉粥黔敖絕後塵開倉汲黯愧今臣天王肝食朝元閣
不道佳人自鬻身

簡烏涇重陽道院儲無極鍊師

風露高天夜氣分神游爲謁紀星君酒材藥料凡三品
付與山人老臥雲

王處士袖四六啟謝製壽藏序銘因出示靜習橐
爲題絕句 序銘後附

露盥薔薇細細披朱弦疏越大音遺不同司馬論封禪
尚少柴桑擬祭辭

處士上海人名泳字季深姓王氏宋進士日輝之曾孫元故鎮江儒學教授遷衡山主簿鏞之子也性愛易自號靜習或問靜何習輒對曰習不由靜未會學也先是衡山君卒遺命以庶弟奉其生母處士悉畀舊田宅而所居地僅數弓廬十尺冬夏一裘葛日蔬飯晏如也配沈丹徒尹烈孫女生一女適邑儒吳茆一子上殤門生劉緝冠履昆季爲買龍華之原營壽藏處士角巾藜杖消搖青松閒而歌曰蠶何物兮蠶是室兮吾其願畢兮抑亦二三子之力兮歌闋長嘯

而返閒謂沈曰吾死貧無以斂特得爲黔婁妻不既賢乎沈曰妾老尚績圖夫子暖老計妾不願賢如黔婁氏之妻也聞者多之至是請予壽藏銘予以高朗令終處士其庶幾哉銘曰生斯游死斯藏古賢達是方雖晦也孔光

經楊節婦故居

有序

龍華雨晴劉松屋老人同野步道經一故第謂楊節婦家也丁丑夏彗星現天下童男女譌惑皆成配時楊年十三贅張都水子裕十五生一女十七裕蚤世

楊誓守節今幾五十矣昔蘇文忠有林氏媪詩請繼
後響詩曰

日度齏鹽歲臬麻望中脩竹帶叢葭老人爲說睂山叟
詩紀青裙紫笑花

十七媪居亂幾更隔溪聞得紡車聲卻思臣妾書降表
不獨南朝謝道清

題張守中所藏祖父洎母陳夫人三器圖銘烏涇
楊生士中一首後附

守道非難守器難圖銘復遣子孫看銅仙滴盡劉郎淚

一夜秋風折露盤

一目圖銘意也消孝承先世自前朝衣冠不似杯棬舊
誰在羹牆復見堯

仁廟曾稱孝順孫盤盂復保後來昆杜陵文焰輝星
斗柱記田家老瓦盆

李哥有序

哥灞州倡女年甫十二三母教之歌舞哥泣曰女率
有紅繫我獨爲此乎母告以倡業不可廢哥曰若此
聽媪媪亦當從我好母陽許之自是不粉澤茹葷所

歌多仙曲道情有召者必詢客主姓名乃往人亦預
相戒無戲狎哥凝立座閒酒行歌闕賜之酒不飲灞
州判官嘗忤哥徑還誓不與見孟津縣監賂哥母夜
抵舍哥懷利刃閉臥內罵監曰汝職風化首而狗羯
行不去血汗吾刃監慚去明日知州事者聞之歎曰
州有貞女不知吾失也吾次子明經舉秀才眞若配
也以禮聘娶之未幾紅巾入寇夫婦被執以哥美將
殺其夫哥走前抱夫項大呼曰吾斷不從汝求活寇
并殺之河南理幕沈易云

蟬蛻汗塵配鳳難亂中同死義尤安灞津落盡垂楊葉
月魄清遊奈薄寒

長倡優解愛身士遭離亂合安貧艾蕭荆棘蘭參伍
畢竟幽香獨占春

題讀碑圖

銅臺花柳暖雲迷天塹雲山白浪齊若也孝娥碑果讀
終身無愧漢征西

寄題日本國飛梅有序

國相管北野者剛正有爲庭有紅梅雅好之一日被

証謫宰府未幾梅夜飛至北野卒死謫所國人立祠
梅側僧進得中云

瘴日雲霾不放歸精神解感禹梁飛水香霞豔渾無志
瘦比疊臣帶減圍

陳生尚秋容軒中醉題芙蓉便面

露莖月朶玉河干莫作仙人掌上看三十三天秋似洗
通明前殿薄生寒

白塔行 有後引

塔成始刺天塔壞漸平地一曲冬青花江山肅秋思

冬青花不堪折南風吹涼積香雪搖搖華蓋萬年枝
上有鳳巢下龍穴羊兒年犬兒月霹靂一聲天地裂
右雷門唐珏玉潛先生感雷震白塔而作也始宋諸
陵被總統楊璉真伽遷置故內鎮以白塔先生嘗與
尚書省架閣林景熙躬拾不盡遺骨別葬山中旣先
生植冬青爲識遇寒食則密祭之一夕夢黃袍者數
人率一嬰兒狀玉雪指示曰以此報掩埋之德先生
後得子因名珏珏字溫如豪於詩至正己亥予游錢
塘會平章張士信壞塔螿城且聞松江積慶講主道

宣傳誦是詩宣幼從琪學有請乃爲賦白塔行并系
前後事歸之宣云

題費長文所藏微廟暮雪寒鴉

寒鳥立枯槎
翮鍛深噤舌
似顧夷門雲
卻帶燕山雪

梧溪集卷第四下

